

МЕСЯЦА АВГУСТА В 25-Й ДЕНЬ (7 СЕНТЯБРЯ ПО Н. СТ.)

Преподобномученика Моисея (Кожина), иеромонаха Соловецкаго,
Оленицкаго

НА МАЛОЙ ВЕЧЕРНИ

На Господи, воззвах: стихиры на 4. Глас 6:

Преподобномучениче Моисее, / в тихое пристанище Соловецкия
обители притекл еси, / пощением и слезами, молитвами и песнями /
непрестанно прилепляяся Богу, / ты в годину гонений на Церковь
Русскую / душу свою за Христа положил еси, / житие свое венцем
страдания увенчав. / Настави люди твоя пети тя и Бога славити истинно, //
достохвальный Моисее.

Яко беглец, из святых обители Соловецкия / в Поморскую страну
изгнан бысть, преподобномучениче Моисее, / Христу последова, нача
подвизатися в церкви Иоанна, Предтечи Христова, / яже в веси
Оленицкия, / и тамо благий и верный быше раб Господень. // Темже
почитаем память твою всечестную.

Радуйся, преподобномучениче Моисее, / болезни и труды
благодарно претерпевый, / и посреде мятелей многих веру Христову, /
благодать и любви до конца сохранивый, / и за Христа славную кончину
приявый. / Обаче ин суд Божий, ин человеческий: / скорый и неправый ты
на смерть осуди, // Небесный же и Божественный почестыми победными
венча.

Отче преподобне Моисее, / в тяжкую годину испытаний веру
Христову поругаему обрел еси / и себе самого, яко жертву живую, Богу
принесл еси. / Ныне Господь показа тя, светильника Своего, / сияюща на
свещнице Церкви, / искушением вражиим противоставша, / и сонма
новомучеников Церкви Русския / украшение пресветлое являшагося. /
Тем венча тя Человеколюбец Господь за сугубыя скорби и горести, /
нашедшия тя в letech сих нечестия, // и прият тя во славу Божию.

Слава, глас тойже:

Восхвалим днесь песнями страдальца обители Соловецкия / и земли
нашей Кольския / преподобномученика Моисея. / Сей в церкви Рождества
Иоанна Предтечи / служитель неленостный явился есть, / твердо Христа

исповѣдуя / и напасти вражия нивочтоже вменяя, / низложїи бо
безсильныя дѣмонскія дерзости / и суетную ярость безумия безбожных /
и обрете дерзновение благое ко Господу, / ныне же молится со всеми за
Христа пострадавшими // о спасении душ наших.

И ныне, Богородичен, глас тойже:

Радуйся, Звездѣ светозарная, / Свѣт, прежде денницы от Отца
возсиявший, / неизреченно рождающая, / Того сиянием озари души наша, //
спящая во тьме и сени смертной.

На стиховне стихирѣ, глас 4:

Промыслом Божиим и человеческим избранием / служитель верен
бывше обители Соловецкия / и помощник в скорбех презрѣдных,
обретших братию зело. / Помози и нам, отче Моисее, / верно чтущим
память твою, // в вере истинней утвердиться.

Стих: Честна пред Господем / смерть преподобных Его.

Земная отринув, Небесная себе уготовляя, / яко страдалец за
истину, / мужественно ради братии своей не оставил еси вины славе
обители. / Даже до крове пострадавший, / противу хулников, гонителей и
досадителей Церкви подвизаяся, / Небесныя сладости вкусил еси, /
страстотерпче дивный, / сея сладости испроси и нам у Христа, Спаса
нашего, // яко молитвенник о душах наших.

Стих: Блажен муж, бойся Господа, / в заповедех Его восхощет зело.

Во изгнании бывый, / скорбь непрестанную и уныние растворял
еси / слезами и воздыханьями о обители Соловецкой матеролѣпней, / от
безбожных разоряемой, / доблестный отче Моисее, / в нейже лета
много подвизався, / многия подвиги и труды понесл еси. / Ныне же,
священныя рuce твои у Престола Святыя Троицы простирая, / поминай
Кольскую землю рождения своего / и обитель Соловецкую, юже
возлюбил еси, // и моли о спасении славящих тя благочестно.

Слава, глас тойже:

Первое добрым подвигом твоим преподобническим / в житии
земном Богу угождая, / страданием мученически житие твое скончал

есї. / Тѣмже венча́ тя Господь за сугубыя скорби и горести, / нашедшия на тя в лѣтах сих нечестія, // и прїят тя во славу Свою.

И ныне, Богородичен, глас тойже:

К покрову Твоему прибегаем, / Дѣво Богородице, / и молим Тя: скоро на помощь нам, / верно чтущим Тя, предвари / и от враг видимых и невидимых избави, // Ты бо еси заступлѣние наше.

Тропарь писан на велицей вечерни.

Ектенія малая и отпу́ст.

НА ВЕЛИЦЕЙ ВЕЧЕРНИ

Блажен муж: 1-й антифон.

На Господи, возвах: стихіры на 8, глас 5:

Приидіте, вернии, / священное и честное преподобнаго Моисея торжество пѣсньми днесь воспойм, / восхвалим ревнителя и защитителя обители Соловецкия / и Поморія севернаго вѣси Оленицкия: / во времена гонений на Церковь Русскую / сонму новомучеников сопричтен бысть, / ныне же, предстоя Престолу Господню, молится, // да и мы Царствию Христову приобщимся. *(Трижды.)*

Приидіте, боголюбцы, / ко Христу любовью утреннююще, / радости страдальца предивнаго Моисея причастицы будем. / Ты, отче преподобне, / заступая отечества своего вверенную ти святыню, / тверд и непреклонен явился еси, / всячески утесняемь и изгоняемь от враг быв. / Господь же упование тебе бысть, / прихода Оленицкаго последний начальниче // и славный страсотерпче. *(Трижды.)*

Приидіте, христороубивии людіе, / восхвалим ратоборца и защитителя доблественнаго святынь отеческих, / иже воинству Царя Небеснаго сопричтен бысть, / земное воинство отверже, рекий: / яко несть наша брань противу крови и плоти, / но к миродержителем тмы века сего, / к духовом злобы поднебесным. / Блажен еси, живот свой положивый / за веру Православную и за искренния своя, // всехвальнейший преподобномучениче Оленицкий. *(Дважды.)*

Слава, глас 8:

Во изгнании покинул еси оток Соловецкий, святый Моисее, /
молитву непрестанную слезами растворяя / о возлюбленной обители, от
безбожных разоряемой, / в нейже многия подвиги и труды понесл еси. /
Во отечестве своем во дни Пасхи Христовой / держа о Имени Господа
Воскресаго, / от безбожных мучу претерпел еси. / Ныне же, Престолу
Божью предстою, / прославляеши Отца, и Сына, и Святаго Духа, // Троицу
Единосущную и Нераздельную.

И ныне, Богородичен:

Царь Небесный / за человеколюбие на земли явися, / и с человеки
поживе, / от Девы бо Чистой плоть приемый / и из Нея прошедый с
восприятием. / Един есть Сын, сугуб естеством, / но не Ипостасию. /
Темже совершенна Того Бога / и совершенна Человека воистину
проповедающе, / исповедуем Христа Бога нашего: / Егоже моли, Мати
Безневестная, // помилуй души наши.

Таже вход. Прокимен дне.

Чтения три.

Пророчества Исаиина чтение:

Тако глаголет Господь: вси языцы собращася вкупе, и соберутся
князи от них. / Кто возвестит сия в них? / Или яже от начала, кто слышана
сотворит вам? / Да приведут свидетели своя, и оправдятся, и да услышат,
и да рекут истину. / Будите Ми свидетели, и Аз Свидетель, глаголет
Господь Бог, и Отрок, Егоже избрах. / Да познаете, и веруете Ми, и
разумеете, яко Аз есмь, прежде Мене не бысть ин Бог, и по Мне не
будет. / Аз есмь Бог, и несть разве Мене спасающий. Аз возвестих и спасох;
уничжих, и не бе в вас чуждый. / Вы Мне свидетели, и Аз Господь Бог, и
еще от начала Аз есмь, и несть от рук Моих избавляющий. Сотворю, и кто
отвратит то? / Сие глаголет Господь Бог, избавляющий вас, Святый
Израилев.

Премудрости Соломоновы чтение:

Праведных души в руке Божией, и не прикоснется их муча. /
Непщевани быша во очесех безумных умерети, и вменися озлобление
исход их, и еже от нас шествие – сокрушение, они же суть в мире. / Ибо

пред лицемъ человѣческимъ аще и мѹку приимутъ, упованіе ихъ безсмертія исполнено. / И в мале наказани бывше, великими благодѣтельствовани будутъ, яко Богъ искуси я и обрете ихъ достойны Себе. / Яко злато в горниле, искуси ихъ и, яко всеплодіе жертвенное, приятъ я. / И во время посещенія ихъ возсияютъ и, яко искры по стѣблию, потекутъ. / Судятъ языкомъ и обладаютъ людми, и воцарится Господь в нихъ во веки. / Надѣющіися Нань разумѣютъ истину, и вернии в любви пребудутъ Ему. / Яко благодать и милость в преподобныхъ Его, и посещение во избранныхъ Его.

Премудрости Соломоновы чтеніе:

Праведницы во веки живутъ, и в Господе мзда ихъ, и попеченіе ихъ у Вышняго. / Сего ради приимутъ Царствіе благолѣпія и венецъ доброты отъ руки Господни, зане десницею покрываетъ я и мѣшцею защититъ ихъ. / Прииметъ всеоружіе рвеніе свое и вооружитъ тварь в мечь врагомъ. / Облечется в броня правды и возложитъ шлемъ – судъ нелицемѣрен. / Прииметъ щитъ непобедимый – преподобіе, / поостритъ же напрасный гневъ во оружіе, соборетъ же с нимъ миръ на безумныя. / Пойдутъ праволучныя стрѣлы молниины и, яко отъ благокругла лука облаковъ, на намереніе полетятъ. / И отъ каменомѣтныя ярости исполнь падутъ грады, вознегодуетъ на нихъ вода морская, реки же потопятъ я нагло. / Сопротивъ станетъ имъ духъ силы и, яко вихоръ, развѣетъ ихъ, и опустошитъ всю зѣмлю беззаконіе, и злодѣйство превратитъ престолы сильныхъ. / Слышите убо, царие, и разумѣйте, навѣкните, судий концевъ земли. / Внушите, держащии множества и гордящіися о народахъ языковъ, яко дана есть отъ Господа держава вамъ и сила отъ Вышняго.

На литіи стихіра храма и святаго, глас 1:

Во обители Соловецтей подвигомъ иноческимъ добре подвизался еси, / славный Моисее, / и во Сергіево-Муксалмскомъ скиту, достойно званія ходивъ, / плоды принѣсл еси Христова смиренія, / яко древо благосеннолиственное. / И насъ научи смиряти души наша / предъ Отцемъ Небеснымъ и братьями нашими, // да обрящемъ вѣчную побѣду с тобою.

Слава, глас 4:

Отъ плѣна египетскаго нечестія человеки моисейски избавил еси, / к многоплодію души сродныхъ своихъ Поморскія земли направляя, / яже суть на мѣсте томъ, нарицаемемъ Терскій брегъ, / лику же неисчетному

дóблественных мýчеников приобщи́лся еси́ / и собóру Кóльских
новомýчеников основáние твёрдо положи́л еси́. / Ны́не томú а́нгелы на
Небесéх раду́ются, / с ними́ же и ты песнь побéдную воспева́еши. / Да
ви́дяще, ка́ко лю́бит Господь вёрных сво́их, // и мы Цáрствию Христóву
приобщи́мся.

И ны́не, Богорóдичен:

При́зри на молéние Тво́их раб, Всенепорóчная, / утоля́ющи лю́тая на
ны воста́ния, / вся́кия скóрби нас изменя́ющи. / Тя бо, Еди́ну, твёрдое и
извéстное утверждéние има́мы, / и Твоé предста́тельство стяжа́хом. /
Потщи́ся на умоле́ние Тебе́ вёрно вопи́ющих: / раду́йся, Влады́чице, / всех
пóмоще, радосте и покрóве, // и спасéние душ на́ших.

На стихóвне стихи́ры, глас 1.

Подóбен: Небéсных чинóв:

Ни кня́зя ми́ра сегó, ни влады́к злосту́жных, / претя́щих тебе́, не
убоя́лся еси́, óтче преподо́бне, / véрою и упова́нием на Гóспода был еси́
крéпок. / Утверди́ нас ра́ди любве́ Христóвой терпéти вся мýки и скóрби /
и да́же до сме́рти подвиза́тися о и́стине, // я́коже ты, óтче предивне.

Стих: Проидóхом сквозé огонь и во́ду, / и извёл еси́ ны в поко́й.

Отéчеству своему́ в годíну безвэ́рия был еси́ свети́льник, /
Божéственных Та́ин Христóвых раздая́тель / и душ людски́х врачевáтель
яви́лся еси́, óтче прехва́льне, / те́мже благода́ть Дúха Утéшителя от юдо́ли
сме́ртныя ты возведé // в ви́шняя Небéсная селéния.

Стих: Свет возсия́ пра́веднику, / и пра́вым сёрдцем весéлие.

Éже по óбразу соблю́д невредíмо, / во éже по подóбию, я́ко мóщно,
возшёл еси́, / мýжески бо естество́ понúдив, саможéртвенный служи́телю
Моисее, / сопротиви́лся еси́ терпели́во, / не устраши́лся еси́
мучи́тельскаго прещéния и я́рости богобо́рцев, / véрою нетщéтною во
Христá окриля́емь, / и рíзы сво́я убели́л еси́ то́ками кровéй сво́их, / на
брак А́гнца Божéственнаго возшёл еси́, // преподо́бный страда́льче и
но́вый мýчениче Христóв.

Сла́ва, глас 6:

Распéншемуся за ны Христу́ Бо́гу, / смерть попрáвшему и ад
плени́вшему, / сораспина́лися естé, страстотéрпцы приснопáмятнии, /
мúчениче Моисее со стáростой и парамона́рем церко́вными, / суд
непра́вый и ско́рбную темни́цу, / страда́ния мно́гая претерпéвше да́же до
смéрти мúченическа́я, / в невечéрном же дни Цáрствия Бо́жия / в Це́рковь
Небе́сную свяще́нно внидо́сте / и ны́не Трóице предстоите́, // сия́юще
отту́ду блиста́нии, истека́ющими пребога́тно.

И ны́не, Богоро́дичен:

Творéц и Изба́витель мой, Пречи́стая, / Христóс Господь из Твои́х
ложесн проше́д, / в мя оболкíйся, / пéрвыя кля́твы Ада́ма свободи́. /
Тéмже Ти, Всечи́стая, / я́ко Бо́жии Ма́тери же и Дéве, / воистину вопи́ем
немóлчно: / ра́дуйся а́нгельски, ра́дуйся, Влады́чице, / предста́тельство, и
покро́ве, // и спасéние душ на́ших.

**На благословéнии хлебо́в тропáрь преподобномúченику двáжды
и Богоро́дице Дéво: еди́ножды.**

Тропа́рь, глас 1:

Святы́х Та́ин Христóвых вéрный служи́телю, / покая́ния
проповéднице и кра́я Ко́льскаго печальниче, / преподобномúчениче
Моисее, // моли́ Милостивого Бо́га спасти́ся душáм на́шим.

НА УТРЕНИ

На Бог Господь: тропáрь преподобномúченику двáжды.

Сла́ва, и ны́не: Богоро́дичен: Гаври́лу вещáвшу:

По 1-й стихоло́гии седа́лен, глас 2:

Сове́ту нечестíвых неприча́стен б́ыв, / страда́ния за Христа́, я́ко
благодáтный да́р, прия́л еси́ / и предбу́дущая вещáти сподóбился еси́,
до́блественниче Моисее, / вмени́в сия́ в ра́дость себе́ и во спасéние. /
Вéрен был еси́ Бо́гу да́же до смéрти, / и даде́ ти Господь мзду́ досто́йну,
венéц животá, / и новомúчеником Це́ркве Ру́сския нарече́ тя. *(Два́жды.)*

Сла́ва, и ны́не, Богоро́дичен, глас то́йже:

Предста́тельство неусы́пное има́мы Тя, Пресвята́я Влады́чице, / мольба́м и пла́чем земны́м ско́рое услы́шание, / болéзнем и ско́рбем тёплое сострада́ние, / ру́це, простёртыя в по́мощь обременённм грехми́ и бедáми, / глас, непреста́нно моля́щий милосе́рдие Бо́жие за род челове́ческий.

По 2-й стихоло́гии седа́лен, глас 3:

Мужа́йся, Христо́ва Це́рковь, и держа́вствуй над все́е борю́щими: / Христо́вы бо дру́зи, и предстоя́щие, и отстоя́щие, / я́коже до́блии крепо́душнии, о тебе́ пеку́тся, / присно жи́ви обрета́ются во Ца́рствии Небе́сном, / ихже о́бщий пра́здник ны́не соверша́ем све́тло. *(Два́жды.)*

Сла́ва, и ны́не, Богоро́дичен, глас то́йже:

Возжа́да душа́ моя́ Тебе́, Спа́се мой, / я́ко живота́ исто́чник има́ши воисти́ну, / Свет ми́ру Невече́рний Богоро́дицею возсия́вый. / То́я всеси́льными мольба́ми / Небе́сных благ сокро́вище отве́рзи ми, Влады́ко Многоми́лостиве.

Велича́ние:

Велича́ем тя, / преподо́бному́чениче Моисее, / и чтим по́двиги и страда́ния тво́я, / я́же за Христа́ // претерпе́л еси́.

Псалом избра́нный:

Весть Госпо́дь путь пра́ведных, и путь нечестивых поги́бнет. / Рабо́тайте Господеви со стра́хом и ра́дуйтесь Ему́ с трéпетом. / Ты же, Госпо́ди, Засту́пник мой еси́, Сла́ва моя́, и вознося́й главу́ мою́. / Помилуй мя, Госпо́ди, я́ко немо́щен есмь, исцели́ мя, Госпо́ди, я́ко смято́шася ко́сти моя́. / Отступите́ от мене́ вси де́лающии беззако́ние, я́ко услы́ша Госпо́дь глас пла́ча моего́. / Госпо́ди, Бо́же мой, на Тя упова́х, спаси́ мя от всех гоня́щих мя и изба́ви мя. / По́мощь моя́ от Бо́га, спаса́ющаго пра́выя се́рдцем. / Да упова́ют на Тя зна́ющие и́мя Твое́, я́ко не оста́вил еси́ взыска́ющих Тя, Госпо́ди. / Ты, Госпо́ди, сохрани́ши ны и соблюде́ши ны от ро́да сегó и во век. / Возда́ст ми Госпо́дь по пра́вде мое́й и по чистоте́ руку́ мое́ю возда́ст ми. / С преподо́бным преподо́бен бу́деши и с му́жем непови́нным непови́нен бу́деши. / Зако́н Госпо́день непоро́чен, обраща́я ду́ши, свиде́тельство Госпо́дне ве́рно, умудря́ющее младе́нцы.

По полиелѣи седáлен, глас 8:

А́нгелом собесѣдник на земли бысть, достохвальный Моисее, / мѣсленными очима зря Небесная, / егда на подвиг тяжкий за веру ты призвѣ Господь, / ты же, паче укрепляясь духом, ниже восхотел еси отринуть чашу сию / или пути священническаго уклониться, / но вся претерпел еси, занеже от Господа вся сия быша. / Ныне же, в Небесных обителях жительствуя, / молись за ны, страдания твоя чтущия, / да верни повелением Господним пребываем, / друг друга любяще и мир в себе имуще. *(Дважды.)*

Слава, и ныне, Богородичен, глас тойже:

Небесная Царице, Госпоже Благая, / любви божественныя сосуде преисполненный, / Твоим всемилостивным заступлением сея животворящая любви сосуды честны спасаемых нас сотвори, / да верни повелением Господним пребываем, / друг друга любяще и мир в себе имуще.

Степenna, 1-й антифон 4-го гласа. Прокимен, глас 4: Честна пред Господом / смерть преподобных Его. **Стих:** Что воздам Господеву о всех, / яже воздаде ми? **Всякое дыхание:** Евангелие от Марка, начало 37.

По 50-м псалме стихира, глас 6:

Где твоё, смерти, жало? / Где твоя, аде, победа? / Все вы ищите верных Господних пожрети, / не имате же власти ни единыя, / победил бо есть вы Спас душ наших Христос Бог, / даровав живот вечный всем земнородным, / верным Царство Свое заповеда, / того наследник Моисей житием праведным и кончиною мученическою явися. / Ныне, память преподобномученика воспевающе, / начало вечнаго жития его в Бозе празднуем // и к помощи его молитвенней взываем.

Канон Богородице со ирмосом на 6, и святому на 8, глас 6.

Песнь 1

Ирмос: *Волною морскою / Скрывшаго древле / гонителя мучителя, / под землю скривших спасенных отроцы; / но мы, яко отроковицы, // Господеву поим, славно бо прославися.*

Запéв: Святýй преподобномúчениче Моисée, // моли́ Бóга о нас.

Сподóби, Гóсподи, пéснями прослáвити по достоя́нию Твоегó уго́дника, / Ёмя Твое́ прослáвльшаго, / доброхра́браго Моисе́я преподобномúченика, до́блестнаго во́ина Твоегó, / прегóрдаго велиа́ра попра́вшаго и Цéрковь Христо́ву кровью́ свои́ми украси́вшаго. / Мы же, соше́дшися в лётный пра́здник досточúдныхя па́мяти егó, / восхва́лим пéснями и испове́даньями досто́йно.

Ве́ре Христо́ве и любви́ Божéственней измла́да прилежа́л еси́, / болéзни и труды́ благоду́шно претерпева́я, / посреде́ мятéжей мно́гих до конца́ сия́ сохрани́л еси́ / и за Христа́ сла́вную кончи́ну прия́л еси́. / Оба́че ин суд Божий, ин челове́ческий: / ско́рый и неправый́ ты на смерть осуди́, / Небе́сный же Божéственный по́честьями побéдными ты венча́.

Тя, óтче преподóбне Моисée, / в тяжкую́ годи́ну испытáний Гóсподь показа́, я́ко свети́льника Своегó, / сия́юща на све́щнице свя́те, Цéркве, / искуше́нием вра́жиим противоста́вша, / просвещáющаго ду́ши ве́рных све́том страда́ний за Христа́ / и со́нма новомúчеников Цéркве Рýсския украше́ние пресве́тлое явля́шагося.

Богорóдичен: Пу́ть ко спасéнию открýла еси́ нам, Богорóдице, / жити́я непорóчнаго óбраз чистей́ший явля́ющи. / Те́мже, на Тя взира́юще и Тебе́ моля́щися, / из глубины́ серде́чных взывáем: / я́звы грехóв и стру́пы страсте́й на́ших исцели́ слезáми покая́ния.

Песнь 3

Ирмо́с: Тебе́, на вода́х / повéсившаго всю зéмлю неодо́ержимо, / тварь, ви́девши на лóбнем ви́сима, / у́жасом мно́гим содрага́шися, // несть свят, ра́зве Тебе́, Гóсподи, взывáющи.

Оте́честву земно́му в чине́ во́инством на плúтве досто́йно послужи́в, богоревни́ве Моисée, / во́инству Христо́ву приобщи́тися и еди́ному Бóгу порабо́тати зело́ возжелáл еси́ / и, во обите́ль отóка Соловёцкаго всели́вся, / досто́йно в чине́ ино́честем и са́не иерей́стем Гóсподеви послужи́л еси́.

В бра́тстве ино́честем усéрдно подвизáвся, Моисée всехва́льне, / восходи́л еси́ от си́лы в си́лу / и, к мона́шескому чину́ и са́ну свяще́нному сопричтён быв, / служéние своё́ попрёмно́гу соверша́л еси́ / под

заступлѣнием Зосѣмы, Саввѣтѣя и Гѣрмана, первоначальников обѣтели, / к њмже умилѣнною душѣю и сокрушенным сѣрдцем молитвы простира́л еси́.

Моисѣй, вели́цый во проро́цех иногда́, жезло́м своимъ, яко крѣстнымъ зна́мением, во́ды разделѣв, / проше́д со израильтяны сквозѣ Чермно́е мо́ре и земна́го обетова́ния дости́же, / ты же, преподобномучениче Моисѣе, крестоноше́нием плоть свою́ умертвѣв, / земли́ обетова́ния дости́гл еси́, в нейже правда живѣт.

Богородичен: Обрѣтши благодать у Сына Твоего́ заступати немощный род челове́ческий, Богородице, / неусыпно назира́еши лю́ди христи́анскія, / ино́ком наипа́че покровѣтельствуеши, / яко а́нгельскому чѣну подража́телем. / Сама́ бо вы́шши всехъ А́нгел и Арха́нгел жи́тельство нам явила́ еси́.

Седáлен, глас 5:

Егда́ безбо́жнии тща́хуся сокры́ти тя в темни́це, / ты, блаже́нный Моисѣе, яко луч Со́лнца Пра́вды явился еси́, / посрамля́я ипа́ты, и воево́ды, и мучи́тели, сущія во власте́х, / и страда́ньми тво́ими мглу безбо́жия и злообы́чия над Оте́чеством на́шим разсе́ял еси́. / Мо́лим тя, страда́льче святы́й: / моли́ся за ны ко Го́споду, / поприще жити́я на́шего нам досто́йно прои́ти, / вѣчныя погѣбели изба́витися и воинами свѣта явѣтися. *(Два́жды.)*

Сла́ва, и ны́не, Богородичен:

Засту́пницу Тя има́мы пред Бо́гом, Пречи́стая Дѣво, / не прѣзри раб Твоѣх, на предста́тельство Твое́ надѣющихся, / молѣние на́ше приими́ и по́мощь с Небесе́ низпосли́, / да спасѣние душ на́ших обря́щем.

Песнь 4

Ирмо́с: *На Крестѣ́ Твое́ Божѣственное исто́щание / провѣдя, Авваку́м, ужáсса, вопи́аше: / Ты си́льных пресе́кл еси́ держа́ву, Бла́же, // приобща́яся сущим во а́де, яко Всеси́лен.*

Повелѣ́нию Господню́ повину́яся, / крест настоя́тельства во отѣчествии своемъ со смире́нием при́ял еси́, Моисѣе достохвально́е. / Егда́ же си́ла вра́жия безумно на приходъ Цѣркви твоея́ воста́, / страда́ния,

предуготованная тебе, безропотне восприял еси / и сораспяться Христу последовал еси.

Ни врага рода человеческого, ни владык богохульных, / ни оружников дерзосердых, претящих тебе, не убоялся еси, священномучениче Моисее, / верою и упованием на Господа был еси крепок, / призывая чад своих к терпению скорбей и стяжанию смирения Христова.

Православная Церкви светильнице, священный Моисее, / паче укрепляясь духом, страха человеческого никако устрашился, / ниже восхотел отринути чашу страданий / и, кровью мученическими неугасимо светяй, / вся претерпел еси, яже от Господа, / ныне же, у Престола Божия предстои, молися о чтущих тя.

Богородичен: Молим Тя, Богородице Дево, вражими злодействы обуреваемии: / сетей злоухищренных свободи, / мучительства страстей нас избави, / мир Божий в души наша водвори, терпением Христовым снабдевающи.

Песнь 5

Ирмос: *Богоявления Твоего, Христе, / к нам милостивно бывшаго, / Исаия, Свет виде в Невечерний, / из нощи утреневав, зываше: / воскреснут мертвии, и востанут сущии во гробех, // и вси земнороднии возрадуются.*

Обеты мнишеския известно исполняя, Моисее прехвальне, / печальным был еси утешитель и малодушным ободритель, / пастырь словесному стаду Христову явился еси, / темже и, стезею страсотерпческою вкупе шествовав, / мученичества красотю с паствою твоею украсился еси, отче священнейший, / тако и ныне не забуди нас, ты прославляющих.

Все упование твое на Господа возложил еси, / и Той утверждение тебе бысть, / пострадати за Христа сподобился еси, / унижение от беззаконных и изгнание во юдоль мучений, / труды подневольныя, и поношения, и клевету, / вся до крове претерпел еси, преподобне.

В церкви Рождества Иоанна Предтечи служитель неленостный явился еси, отче Моисее, / твердо Христа исповедуя и напасти вражия

нивочтоже вменяя, / низложил бо еси безсильныя демонския дерзости и суетную ярость безумия безбожных, / обрел же еси дерзновение благое ко Господу, / и ныне моли со всеми за Христа пострадавшими о спасении душ наших.

Богородичен: Над землею Русскою Покров державный распростерши, / не оставила еси нас от злодеяний лстываго погибнути, Заступнице Всемилостивая. / Помози нам и ныне веру истинную без страха исповедати / и Православия поборником быти.

Песнь 6

Ирмос: *Ят бысть, / но не удержан в персех китовых Иона: / Твой бо образ нося, / Страдавшаго и погребению Давшагося, / яко от чертога, от зверя изыде. / Приглашаше же кустодии: / хранящии суетная и ложная, // милость сию оставили есте.*

Егда мрак безбожия постиже землю Русскую и Соловецкую обитель в темницу обрати, / тогда многоскорбное сердце твое исполнися болезней и скорбей, / яже и до конца мужественно понесл еси, Христов страстотерпче, / Промысл Божий благий во всем разумеая.

Христа Подвигоположника пред мысленным взором всегда имея, отче Моисее, / Тому не обинуясь последовал еси / и крест свой мужедоблественно понесл еси, / все упование на Бога всецело возложив, / со смирением и кротостию праведное Его поущение восприяв. / Не остави убо нас, священномучениче, память твою светло почитающих.

Образ смирения Христова и любве Его / житием твоим показал еси, страстотерпче, слезно взывая: / тщитесь, друзи, достигнути совершенства, яже любви есть. / Верность Христу Владыце и званию вышнему достойно сохранил еси, / сопричастник Кольским и Соловецким новомучеником явился еси / и Церковь Русскую подвиги своими светло украсил еси, богомудре.

Богородичен: Владычице мира, Мати Всепетая, / прими сердечную молитву раб Твоих, во умилении Ти приносимую, / и не лиш нас милостиваго Твоего заступления, / но, яко Благая, спаси души наша.

Конда́к, глас 2:

Уподобился еси́ проро́ку Моисе́ю, / ду́шу свою́ за погиба́ющую па́ству положи́л еси́, / у́зы темни́чныя и смерть за Христа́ претерпел еси́, / спаса́й нас моли́твами твои́ми, о́тче Моисе́е, // па́стырю наш преблаже́нный.

И́кос:

Преподо́бным отце́м старобы́тным поревнова́в / и испове́дником ве́ры, за Христа́ страда́ния с ра́достью прие́мшим, послéдовав, / нелóжно Бо́гу потруди́лся еси́ во святе́й оби́тели Соловѣцтей, / си́лою же вра́жиею во времена́ безбо́жная от не́я удале́н быв, / неосла́бне в моли́тве и твёрдем упова́нии дни жити́я своегó провожда́л еси́, / до́ндеже во оби́тели го́рняя ко Влады́це своему́ пресели́лся еси́. / Сего́ ра́ди приле́жно чтим и ублажа́ем тя, / преподо́бному́чениче Моисе́е, па́стырю наш преблаже́нный.

Песнь 7

Ирмо́с: *Неизрече́нное чу́до: / в пе́щи Изба́вивый преподо́бныя о́троки из пла́мене, / во Гробе́ мертв бездыха́нен полага́ется / во спасе́ние нас пою́щих: // Изба́вителю Бо́же, благослове́н еси́.*

Во отечествии своём на Помóрии во изгна́нии пребыва́л еси́, / рыда́я о беззакóнных вели́ких наро́да ру́скаго, / слячен и боля́й душе́ю, се́тующею о вели́честве зла, быва́я, / печа́луясь и моли́твами подви́заяся день и ночь Бо́гу, / в Трóице Единосúщному и Неразде́льному, воздыха́ния сво́я принося́: / Изба́вителю Бо́же, благослове́н еси́.

Ме́сто благих му́жеств, яже сотвори́, / на бре́ге се́вернем в ве́си Олени́це избра́л еси́, досточу́дный Моисе́е, / иде́же богоревни́во в це́ркви Рожде́ства Иоáнна Предте́чи мно́го потруди́лся еси́ / и жити́е земно́е му́ченически сконча́л еси́. / Ны́не А́нгелы на небесе́х и челове́цы на земли́ ра́дуются, / да ви́дяще, ка́ко лю́бит Госпо́дь ве́рных сво́их, победоно́сно взыва́ют: / Изба́вителю Бо́же, благослове́н еси́.

Те́рния бо ненави́сти и волчцы́ безве́рия произведе́ нам Ру́сская земля́ / и плéвелами лжи засе́яна бысть от врага́. / Ты же, благове́рный па́стырю Моисе́е, / земны́я юдо́ли го́рести во мно́жестве позна́в, / благ неизрече́нных ны́не наслажда́ешься, Христо́в страстоте́рпче, / ве́рен бо

Госпóдь, обеща́вый Ца́рствие Небе́сное лю́бящим Его́ и вопи́ющим: /
Изба́вителю Бо́же, благословен еси́.

Богорóдичен: За́вета вѣчнаго Богоизбра́нная Тайннице / и Ца́рства
Христо́ва Всеми́лостивая Врата́рнице! / Го́спода и Влады́ку веко́в умоли́ о
нас немощны́х, озлоблѣнием вра́жиим му́чимых, / Ты бо, Благосе́рдая
Ма́ти, Помо́щница те́плая / и Ходата́ица живота́ вѣчнаго христиа́ном
присно явля́ешься.

Песнь 8

Ирмо́с: Ужасни́ся, боя́йся, Не́бо, / и да подви́жатся основа́ния
земли́: / се бо в мертвецѣх вменя́ется в Вы́шних Живы́й / и во Гроб мал
странноприе́млется. / Его́же, о́троцы, благослови́те, священни́цы,
воспойте, // лю́дие, превозноси́те во вся ве́ки.

Четыредеса́тницу святу́ю по́стнически соверши́в, / Па́сху Госпо́дню
с наро́дом Бо́жиим воспева́л еси́, ду́хом пламене́я, / да соблюде́т Госпóдь
благоче́стия до́брыя зла́ки, / да не пода́влени бу́дут от те́рния, ниже́
смеся́тся с плéвелами, / но да посто́ят и умно́жатся ве́рная ча́да
Христо́ва, / пою́ще и превознося́ще Го́спода во вся ве́ки.

Па́мь твою́ ле́тнюю пра́зднующе, / святы́й новому́чениче Моисе́е,
ра́дуемся и ликовству́ем, / днесь бо Па́сха тво́я соверша́ется, / от земли́ в
селѣния Небе́сная восхо́дом невозбра́нным вни́де, / му́жественне вся
претерпе́в, / Христа́ Воскрэ́сшаго по́я и превознося́ во вся ве́ки.

Тро́ичен: Трипостасны́й Бо́же, / Сло́вом сотвори́вый вся́ческая и
Ду́хом к животу́ призва́вый земна́я и небе́сная! / Ты челове́ческое
естество́ в подо́бие Своё созда́л еси́, / осквернённое же грехо́м Кро́вию
Христа́ Твоего́ па́ки возста́вил еси́, / Его́же, о́троцы, благослови́те,
священни́цы, воспойте, / лю́дие, превозноси́те во вся ве́ки.

Богорóдичен: Послужи́вши Та́йне Бо́жией, челове́ческому
разумѣнию непостижи́мей, / сподо́би нас благода́ти Сы́на Твоего́,
Пренепоро́чная, / немо́щь на́шу укрепí, / жити́е уны́лое ми́лостию Твоею́
обогати́ / и ску́дную моли́тву на́шу Ду́ха Свята́го животво́рными дыха́нии
раствори́.

Песнь 9

Ирмос: *Не рыдай Мене, Мати, / зрящи во Гробе, / Егоже во чреве без семени зачала еси Сына: / востану бо и прославлюся, / и вознесу со славою непрестанно, яко Бог, / верою и любовью Тя величающия.*

Чашу страданий мужественно испив, / исповедником и страстотерпцем Христовым приобщился еси, Моисее преславный. / Страдальческая ради кончины твоея присно Господу предстоиши в Горнем Царстве Его / и молишися дерзновенно о всех людех, наипаче же о прославляющих тя, / и верою и любовью тя величающих, и ныне подвигу твоему подражающих, / к ним же сподобит приблизити Господь и нас, недостойных.

Лик пророческий с Моисеем и Аароном веселием днесь веселится, / яко конец пророчества их на нас исполнится; / днесь сияет Крест Христов над землею Православною, / имже сонм новомучеников Церкви Русския восходит горе от земли на Небо и молится ко Господу, / да посетит виноград сей, / да укрепит ны в грядущих искушениях и временах скорбных, / во еже сподобити нас грешных подвиг по силам воспринять / и в немощи нашей величие славы Божия свидетельствовать.

Христову бо испил еси Чашу, преславне, / венцем неувядаемым украсился еси во Царствии Небеснем, богоблаженный Моисее. / Темже моли о земле Кольстей и обители Соловецтей, / мир и любовь Господня во веки zde да пребудут, / и нас поминай, верою и любовью тя величающих.

Богородичен: Царства Божия бисер драгоценен да возсияет в душах наших Твоими мольбами, Пречистая Дево, / Начальника жизни вечныя Мати. / Помози нам, Благая, / да терпением души стяжавше, воскресения светлую радость невозвратно Тобою обрящем.

Светилен, глас 3:

Светом Христовым просвещаемь, / мрак беззакония попрал еси, преподобне, / мученическими кровью священную ризу очервленив, / вшел еси во Святаа Святых достойно, Моисее премудре, / идеже Свет неизреченный, идеже глас празднующих. / С ними же и мы велегласно

возопи́им: / о́тче Моисее, святы́х прича́стник яви́выйся, / ми́ру
просвеще́ние испроси́ / и душа́м на́шим ве́лию ми́лость. *(Два́жды.)*

Сла́ва, и ны́не, Богоро́дичен:

Свет Живота́ ве́чнаго возси́я нам Тобо́ю, Благода́тная Мари́е, /
плóтию бо родила́ еси́ Жизнода́вца Бо́га, / смерть Попра́вшаго, мир
Собо́ю Обно́вившаго / и всем ве́рным Воскресе́ние Да́рующего.

На хвалíteх стихи́ры на 4, глас 7:

Ре́вностию по Бо́зе распала́емь / и жа́лостию о до́ме Господни
снеда́емь, / святы́ни це́ркви Олени́цкия от расхище́ния и поруга́ния
нечестивы́х сохра́нял еси́, / преще́ний же беззако́нныя вла́сти не
устраши́лся еси́, / до конца́ страда́ния претерпе́в, / спасе́ние души́ обрёл
еси́, / священномучени́че достохва́льне Моисее, // и ны́не сияеши во сла́ве
Господни. *(Два́жды.)*

Землю́ Ру́сскую, безбо́жными гонени́и неща́дно жего́мую, / слеза́ми
и крове́ми твои́ми напои́л еси́, священномучени́че Моисее, / и
испове́данием Трисо́лнечно́го Све́та тму́ а́дову посрами́л еси́, / муче́ния от
сыно́в поги́бели воспри́ял еси́, / те́ло бо твоё во вну́тренних моги́лы
неизвёстной пребыва́ет, / душа́ же тво́я беспеча́льное жи́тельство
насле́довала еси́. / Те́мже стяжа́л еси́ благода́ть моли́тися о нас, // о́тче
преподо́бне.

Па́ству ве́рных сво́их хле́бом сло́ва Бо́жия насыща́я / и вино́м
прему́дрости Богодухнове́нныя напая́я, / теплото́ю любве́ тво́ея да́ры си́я
раствори́л еси́, священномучени́че Моисее. / И ны́не вы́соким
пропове́данием веща́еши ча́дом Це́ркве Ру́сския: / присту́пите ко Го́споду
и просвети́теся, // и ли́ца ва́ша не постыда́тся.

Сла́ва, глас 1:

Сохрани́, Го́споди, оте́чество на́ше моли́твами всехва́льнаго
Моисе́я / и всех новомучени́ков, / и́бо бо́льши си́я любве́ никто́же има́ть, /
да кто ду́шу свою́ положи́т за дру́ги сво́я. / Кровь тво́ю,
преподобномучени́че Хри́стов, изли́ял еси́ за род челове́ческий / и кро́вию
безви́нную багряни́цу Це́ркве Правосла́вныя украси́л еси́, // по́я и
превозно́ся Го́спода во вся ве́ки.

И ныне, Богородичен, глас тойже:

Огнь Божества во утробе неопальне вместивши, / Кивот благодати священнейший явилася еси, Дево Пречистая, / темже пламенем Духа Божественного возжигаети сердца верных / и вечному вражью пламени сих неприкосновенных творishi. / Возсияй, Богомати, и в нас, любве Божия немерцающий свете, / от борющихся враг ограждаючи, // и огнедышация пропасти адовы избави души наша.

Славословие великое и отпуст.

НА ЛИТУРГИИ

Блаженны от канона, песни 3-я и 6-я.

Прокимен, глас 7: Восхвалятся преподобнии во славе / и возрадуются на ложах своих. **Стих:** Воспойте Господеву песнь нову, / хваление Его в церкви преподобных. **Апостол к Тимофею, зачало 291.** **Аллилуия, глас 6:** Блажен муж, бояйся Господа, / в заповедех Его восхощет зело. **Стих:** Сильно на земли будет семя его. **Евангелие от Матфея, зачало 36.** **Причастен:** В память вечную: